

Ingerlatseqatigiiffiit Kalaallit Nunaannilu oqartussaasut whistleblowerqarnissamut aaqqissuussinissamut (kinaassutsimik ersersitsisuunngitsumik ilisimasamik ingerlatitseqqiiinnaanermut periarfissiisumik) malittarisassiuunneqarnissaannut Naalakkersuisut peqquneqarnissaannut Inatsisartunut siunnersuut.

(Inatsisartunut ilaasortaq Naaja H. Nathanielsen, Inuit Ataqatigiit)

Akissuteqaat

(Aningaasaqarnermut, Aatsitassanut Nunanullu Allanut Naalakkersuisoq)

2. Aappassaaneerpeqarnera

Naalakkersuisut Inatsisartut Ataatsimiititaliap Kalaallit Nunaanni whistleblowerqarnissamut aaqqissuussinissaq pillugu isumaliutissiisummik sukumiisumik suliaqarneranik qujaffiginiarpaat.

Ataatsimiititaliap isumaliutissiisutaa Naalakkersuisut naalakkersuisooqatigiinnissamut isumaqatigiissummi 4. december 2014-imeersumi "whistleblowerqarnissamut aaqqissuussinissamut aamma pissaanermik atonerluinerit pisortallu aningaasaataannik atonerluinerit, politikkerinut atorfilittanut pisortani sulisunut kiisalu suliffeqarfinni pisortat pigisaanni sulisunut atuuttut pinngitsoortinniarlugit peqquserlulluni iluanaarniarneq pillugu inatsisiliornissamut" kissaataannut naapertuuppoq.

Naalakkersuisut pissaanermik atonerluinerit pisortallu aningaasaataannik nalinginnarinninneq unioqutitsilluniluunniit atuinerit akiorniarlugit suliniutit isiginiarusuppaat. Naalakkersuisut taamaattumik isumaliutissiisut taparserpaat Kalaallillu Nunaanni whistleblowerqarnissamut Namminersorlutik Oqartussani aaqqissuussinerup 2015-ip naanerani atuutilertussat naatsorsuutigineqartup kingornatigut ukiut marluk atuutereernerata kingornatigut misilittakkanik Inatsisartunut tamanullu saqqummissisoqarnissaani nalilersuinissaq qilanaaraat.

Taamatuttaaq ilisimasat katersorneqartut siunissami politikkikkut aalajangigassanik nukittorsaataasurumaarnissaat, Naalakkersuisunit immikkut ittumik eqqumaffigineqarput. Tamatumunnga ilanngullugu pisortat suliffeqarfiutaanni namminersorlutillu suliffeqarfiutillit suliffiutaanni whistleblowerimik aaqqissuussinerup piviusunngortinnissaanik kissaateqarnerup timalersornissaa.

Naalakkersuisut paasinninnerat naapertorlugu isumaliutissiisummi allannguutissat siunnersuut Naalakkersuisut suliaasaqarfimmumt pineqartumut politikkiannut iliuusaannullu naapertuummat, siunnersuutip Inatsisartunit akuersissutigineqarnissaa Naalakkersuisut inassutigaa.